

Powšitkowne WOZJEWJENJA

njedźelu, 26. julija 2020

Nowa wustajeńca wo česćowanju swjateho Bosćana

W Chróšćanskim Hórnikowym domje wotewru njedźelu, 26. julija, po nyšporje, kotryž je w 14 hodž., nowu wustajeńcu wo česćowanju swjateho Bosćana w Chróšćanskej wosadze. Wona nastu w zamołwitosći Towarstwa Cyrila a Metoda z.t. zhromadnje z Chróšćanskej wosadu a tamnišim Bratstwom swjateho Bosćana składnostnje lětušeje 600. róčnicy založenja tohole bratstwa. Wustajeńca budže tež pozdžišo přistupna. Předwidžane je, ju tohorunja na dalšich městnach pokazać.

Fatimska putniska madona w Kulowje

W Kulowskej cyrkwi witaju sobotu, 1. awgusta, Fatimsku putnisku madonu. W 16 hodž. wotměje so tam marijanski nyšpor. Tutu postawu maćerje Božeje je bamž Pawoł VI. 13. meje 1967 za Němsku poswjećił. Lětsa pućuje wona w Sakskej pod hesłom „Džak za 75 lět měra a 30 lět jednoty“.

Swjata spowědź w Róžeńce

Wšitcy, kotřiž chcyli porciunkulski wotpusk dobyć, maja mjez druhim w Róžeńce składnosć, sakrament swjateje spowědže přijěć, a to sobotu, 1. awgusta, wot 17 do 18 hodž. Spowědnicy budu fararjo Michał Anders, Šćěpan Delan, Měrcin Deleńk a Tomaš Dawidowski.

Z busom do Krupki kemši

Na putnisku Božu mšu srjedu, 12. awgusta, w 10 hodž. w Krupce pojedže zaso bus. Štóz chcył sobu jěć, měł so najpozdžišo hač do pjatka, 31. julija, w Šmitec wozydłowni-
stwjje w Radworju přizjewić, telefonowe čisło (03 59 35) 28 60.

Spěchowanske towarstwo Domu biskopa Bena pyta nowych člonow

Pod hesłom „Kubłanje k žiwjenju“ podpěruje towarstwo Přeceljo a spěchowarjo Domu biskopa Bena Smochćicy z.t. tamniši kubłanski dom. Mjez druhim podpěruja woni zarjadowanja k politiskemu a kulturnemu kubłanju, socialne projekty, serbsko-němsku wzajomnosć a čestne zastojnstwo. Štóz by so rady sobu angažować chcył, je w spěchowanskim towarstwje wutrobnje witany. Lětni přinošk wučinja na člona 60 eurow. Zajimcy njech přizjewja so w Smochćanskim Domje biskopa Bena pak telefonisce pod čisłom (03 59 35) 2 23 15 abo pisomnje z mailku na freunde@benno-haus.de.